



直隸名勝志卷之七

閩中曹學佺能始著

真定府

北至京師六百三十里

領州五縣二十七

曰鮮虞國者春秋晉荀吳假道於鮮虞杜預註云中山之新市縣也曰常山郡者史記漢高帝元年分鉅鹿置恒山郡因山爲名後避文帝諱因改常山也曰東垣縣者十三州志云真定本名東垣以河東有垣縣故此加東也高帝紀十年代相陳豨反帝親往征豨將趙利守東垣攻之不下卒罵上怒及城降斬罵者因改曰真定武帝以爲真定國

矣後周建德六年置恒州唐元和十五年改鎮州
國朝陞爲府復漢真定之名○按志新市城在府
西北卽古鮮虞國也恒山郡城在今治西南十五
里故址猶存魏道武嘗登此望安樂壘者○太平
御覽恒州有望臺趙武靈王所築以望趙境亦曰
寒臺○權城在府城北二十里古捷鄉也後漢建
武元年賈復破青犢於射犬北與五校戰于真定
大破之卽此地○寰宇記云藺相如廉頗李牧宅
皆在郡城內謂之二三將宅○十六國春秋云慕容
熙八年大築龍騰苑廣袤十數里役徒二萬人起

景雲山於苑內基廣五百步峰高十七丈又起逍
遙宮甘露殿連房數百觀閣相交鑿天河渠引水
入宮又爲其昭儀苻氏鑿曲光海清涼池季夏盛
暑士卒不得休息暍死者大半熙遊于城南止大
柳樹下若有人呼曰大王且止熙惡之伐其樹乃
有蛇長丈餘從樹中而出○龍興寺在府治東南
隋開皇六年建初爲龍藏寺創基之日天降異香
恒州刺史鄂國公王孝儉記宋興太祖幸之因繪
像於閣西閣凡五層高十三丈今名天寧閣○風
動古碑在察院公署唐代宗永泰二年成德節度

使開府儀同三司簡校尚書右僕射兼御史大夫
 恒州刺史李寶臣紀功載政因樹此碑碑高三丈
 許剝落不全風起輒搖動故名又有永淳二年恒
 州刺史陶雲德政碑張義感撰文○府治西新市
 治內有藏書室元蘇天爵所建以為讀書之所又
 有舒嘯臺朱澤民為之記○神女樓在府城北舊
 有臺俗呼為神女臺○陽和樓在府城南元至正
 間建有學士楊俊民碑○唐高適真定即事贈常
 使君詩城邑推雄鎮山川列館圖舊燕當絕漠全
 趙對平蕪曠野何彌漫長亭復鬱紆始泉遺俗近
 活水戰場無月換思鄉陌星迴記斗樞田園同季
 子儲畜異陶朱方欲呈高誼吹噓揖大巫從來貴
 縫掖應是念窮途元虞集詩滋源恒伏流春雨川
 乃盈林疇廣敷潤草木俱繁榮臨深見浮儵仰喬
 有鳴鶯君子樂在斯齋居託令名右即詠蘓叅知
 書室者

真定縣附郭

釋同郡寰宇記云大茂山在縣西南界即恒山之
 別名也禹貢恒水所出俗謂之太白山漢武帝幸
 北岳還瘞玄玉于此山山麓有玄石塚玄石者未

詳何許人中山酒家與之千日酒語其節以歸數
百里尚可醉玄石如其言飲之至家果然家人以
為死棺斂葬之酒家計其期憶必醉而解也往問
之其隣人曰玄石死三年矣與之至其塚掘而開
棺玄石醉始解起于棺中右見中山記○十六國
春秋慕容麟率丁零之衆入中山斬慕容詳及其
親黨三百餘人僭稱尊號值中山饑甚麟出據新
市與魏師戰于義臺麟軍敗潰魏師遂入中山○
注水經曰滋水又東出新市縣入滹沱河新市故
城又東經常山城北東南為蒲澤濟水有梁馬俗

謂蒲縣口河中有蛟五月恒暴遂變為人與岸上
人同行至懸絕處推之俱下今不復見○西韓河
發源大鳴泉至縣西二千里流入滹沱以韓信引
兵伐趙經此而名○唐天寶末年安祿山反陷常
山郡肅宗遣李光弼復之賊帥史思明來攻光弼
出兵五千為槍城于道夾滹沱而陳因擊走之今
名覆橋者是○雕橋在城西十五里橋下有穴十
數泉湧不息狀如雕鑿故名○晉傅咸詩云奕奕
恒山作鎮冀方伊趙建國在岳之陽○唐文粹房
鳳撰北嶽真君碑八分書開元二十年正月立○

金石畧載唐真定令柳君紀德碑裴伯撰并八分書開元十二年又真定令杜府君遺愛頌李鋸撰開元二十五年○文獻通考天聖鹵簿記翰林常山宋綬公垂撰天聖六年十一月上其考訂援証詳洽可稽

井陘縣

在府西南百五十里

穆天子傳癸未雨雪獵于劔山之西河注云燕趙謂山春爲陘也○寰宇記云陘山在縣東南八十里志謂去縣東北五十里四面高中與下如井故曰井陘史記漢高帝元年韓信張耳東下井陘

成安君子此因縣之唐武德初立井州旋廢爲縣縣城當控扼之要也○唐王維送趙都督赴鎮詩天官動將星漢上柳條青萬里鳴刁斗三軍出井陘忘身辭鳳闕報國取龍庭豈學書生輩窓前老一經○志云劍山在縣東十里秀削如劍鋒亦陘屬也又二十里爲城山周遭起伏有類城垣故名又二十里爲神山巘谷幽深神明不測上有古山神祠又十里爲石墻嶺懸崕險峻僅分一線云○縣西十里百華山林壑深邃石磴崎嶇春時群卉爭開爛漫又二十里爲兩下嶺形勢陟下東西墻

立因名○縣南三十里筆架山三峰屹峙如筆架
然又三十里爲射堞山相傳秦將王翦伐趙立射
的于此又十里爲鸞臺山相傳隋文帝邀其女妙
陽公主駐蹕于此側近有慶福寺在蒼崑山下寺
卽妙陽公主所建以爲脩行之所○縣西北二十
里大臺山趾削頂平雄秀甲于封內○縣北三十
里青石嶺其上產青石也又十里爲鹿耳嶺山脅
兩開形如鹿耳故名又十里有團尖山峰圓勢銳
與陘山相爲環蔽○史記趙李左車語韓信曰井
陘之道行數百里車不得方軌騎不得並列應此
慶矣○綿蔓水卽穆天子所云西河也源出陘山
上志謂韓信擊趙使萬人先行背水爲陣處後漢
光武封鄗况爲綿蔓侯以此水名○縣東南十五
里冶河一名甘陶河發源松嶺合綿蔓水東南流
至平山入滹沱○城邑攷云圓星城在縣界見魏
書○秀林城在縣東南十五里後魏杜洛周葛榮
遣王秀林築此因名○葦澤城在縣東北二十五
里隋置縣屬井州後省入有故址存○靈真城在
縣西南三十里相傳韓信伐趙隨蛇跡開道而過
因築此後人名爲靈真城○威州城在縣東北五

十里金時建今廢爲堡○祠廟記云張祥京兆人
隋開皇中遷井州司馬時漢王諒舉兵反遣其將
劉建畧地燕趙至井陘祥勒兵拒守建攻之復縱
火燒其郭下祥見百姓驚駭城側有西王母廟祥
登城望之再拜呼泣而言曰百姓何罪致此焚燒
神其有靈可雨相救言訖廟上雲起驟雨火滅士
卒感其志誠莫不用命○妬神祠碑在井陘西南
故關昔介之推從文公出國有割股之恩隱于綿
山文公求之遂自焚死因號寒食後人于此日不
敢舉火其妹於冬至之後日積一薪列火焚之以

易其俗謂之妬神唐大曆十三年游擊將軍上柱
國李謹撰祠頌併序其銘曰凡有異行宗之曰神
匪害於物寔利於人兄則焚火妹乃積薪共爲佳
節在乎芳春今古千齡方圓百里德音無斁蒸嘗
不已薦且珍羞服先錦綺所求必應高山仰止將
軍塞下細柳營邊晴開朝鏡霧雜爐烟神理昭昭
靈草芊芊紀諸令範光武承天井陘西南大原東
北妬神之水澹爲黛色跳波噴浪如有可則古往
今來源流不忒○唐岑參題井陘雙谿李道士所
居五粒松花酒雙谿道士家欲求縮却地鄉路莫

教賒

獲鹿縣

在府西南五十里

本中山國之石邑也趙武靈王二十一年攻中山取石邑卽此隋開皇十六年分石邑置鹿泉至德二年改今名宋以石邑省入右石邑故城在縣北八里有竇建德寨○寰宇記云鹿井出井陘口南山下今名土門口卽太行八陘之第五陘也其山圓峻俗呼韓信臺昔韓信擊趙欲下井陘成安君陳餘聚軍井陘口號二十萬卽此處○唐李光弼自常山擊賊帥史思明復遣步騎二千掩殺其衆

于逢壁思明失勢退入九門光弼遣裨將張奉璋以兵五百戍石邑賊將蔡希德來攻奉璋拒却之○郡國志云飛龍山在縣西南四十五里一名封龍山有馬鞍嶺漢光和中建精舍前趙錄王浚遣祁弘率鮮卑討石勒戰於飛龍山下勒師大敗卽此○注水經云汶水東經飛龍山北是井陘口汶水一名童水地理志謂出常山石邑縣西是也陘口又名土門每歲有疾風雷雨東南而行俗傳此山神女爲東海神兒妻故歲一往來今祠林盡壞而三石人猶存衣冠完好其北卽張耳故壚耳山

上有水周廻四十步俗呼為龍泉○隋圖經云鹿
 泉縣有大翻山昔一書生得道化為雙鶴冲天墮
 翻於山中故名○抱犢山本名草山草音蔽相傳
 韓信伐趙使輕騎二千人持赤幟從間道登蔽山
 而望即此後魏葛榮之亂百姓抱犢而上始改今
 名有交龍洞在抱犢山陽洞內石棋盤二如龍交
 抱之狀又東南嶺有草名玉照夏發枝冬生花高
 五六尺服方七日能不饑○屏風山在縣西南三
 十里高數百丈峰巒巨削宛若屏風水雪時霽望
 如畫圖○塚廟記云漢趙佗墓在石邑縣北十三
 里佗真定人僭號南越文帝為其先人置守塚昆
 弟在者存問之佗遂釋黃屋左纛而稱臣○趙王
 塚在縣東三十里趙陵鋪塚大者六小者二十三
 俗傳為戰國趙王塚○靈巖隱洞有石龕佛像每
 入一洞境漸幽窈迥絕人世○海山石栢在縣東
 北陰崖間脉理縱橫不假雕鑿天然翠栢枝葉悉
 具里人採之以為玩○唐岑參宿石邑山中浮雲
 不共此山齊山靄蒼蒼望轉迷曉月暫飛高樹裏
 秋河隔在數峰西

靈壽縣

在府西北六十里

土地十三州志云靈壽中山桓公新都系本云中山武公居顧桓公徙靈壽史記世家魏樂羊爲文侯將攻拔中山封之靈壽是矣漢置縣至今仍○禹貢相衛旣從大陸旣作水經注云衛水出常山靈壽縣西東北入滹沱河又經石疇山山形小而峻三面削絕一名五岳山又有五臺之稱昔文殊行道所也袈裟水出焉○楸山在縣西北七十里崑壑多產楸樹故名其東爲魯柏院山峭壁雙峙有口至狹謂之龍門口○寰宇記云派水經白羊山山之下有白石如羊頭角身足燦然逼真從行唐縣東過溫泉入故房山縣界○志云養魚池在趙王城內中山武靈山故跡也松陽河在縣治南源發楸山入滹沱河又縣西北二十五里之白石村有聖水涯西北九十里之橫嶺有大明川西北二十里之祁林寺傍有葛蒲溝俱流入滹沱○本草云菖蒲一寸九節出靈壽者佳○縣西南之王覺村山水衝開一池濶五畝其蓮特盛不種而葩○史記世家樂毅靈壽人其先世祖爲魏文侯將取中山封于靈壽子孫因家焉

元氏縣

在府城西
南九十里

本趙公子元之封邑孝成王十一年城元氏漢以爲縣矣東漢光武四年北征彭寵陰后從行生明帝於元氏後章帝巡幸祠光武顯宗於始生堂奏樂皆用新詩復元氏賦租一年按志元氏故城在今治西北二十里王莽易爲井闢亭今縣北之萬年村即始生舊址○志云韓臺在縣南三里泯水之陽纍纍相屬相傳韓信出井陘攻趙時虛糧塚也近日有人臺下鑿發得塚甃蓋趙氏公族大臣諸窳窳淮陰侯建幕于其上耳今村與河皆以韓臺目之○漢地理志沮水出元氏縣首受中丘窮

泉谷水東至堂陽入黃河○水經云槐水出元氏之黃石山即贊皇山別阜也水出北崑渡口通於高邑○按志黃石山在縣北四十里上有北岳行祠又有白石山山多白石漢光和中封白石神君去縣西北五十里與飛龍相近○飛龍山亦名封龍山與獲鹿交壤但龍首熊耳二峰在當縣界龍首山下有西谿院唐隱士姚敬棲遁之所又有中谿院宋李文靖公昉受業處也搜異記曰元氏熊耳有丹青樹得而服之成仙其葉一青一黃元安熙龍首峰詩奇峰千仞高突兀倚天表神龍幾何

年俛首效蒼岫我行費躋攀坐睨寒木杪放懷聊
極目已覺塵寰小尚恨世累拘未許謝紛擾會有
賞心人相期拾瑤艸熊耳峰詩窮探不憚遠行登
最高峰頓覺天宇近一洗群山空竒哉此絕境造
化天無功神襟日以曠寫我佚蕩胷口白雲洞在
龍首熊耳二峰之間方廣丈許相傳徐真君脩道
處又名仙人洞下有脩真道館宋政和中賜額安
熙詩峨峨兩峰間崔嵬聳雙闕中有仙人洞恍若
伏池穴朝開白雲生暮掩白雲滅朝昏有竒變宛
與世人隔口試劍石在封龍山之上唐郭元振游
學此山見一石中裂出五色雲氣因得石中寶劍
左丞史彬書試劍石三字于上金南陽樊倫勒頌
按代公有寶劍篇蓋詠是事○神嵩山在縣西南
十里峰巒崇峻儼若神鬼之狀○石溜山在縣西
北二十五里山多崑石旁有長溪廻繞下注深壑
○靈山在縣西三十里漢時封號與封龍無極白
石相等乃縣界六名山之也○長山在縣西北
四十里上有龍井及龍神廟又十里爲九女山傍
有九峰排列故名又二十里爲磨盤山山頂平圓
如磨故名又胡泉大嶺委粟諸山俱在縣西北界

見魏書○縣有箕箔草峪石板蒼岵諸嶺口俱通
倒馬關設兵戍守○吳橋古塚在縣南左村西北
塔傍山水漲溢衝激畧不騫移相傳爲漢梁山伯
墓未詳○孤嘗君墓在縣西十五里之蘇陽村山
脊上山下有鷄鳴口○集古錄云北岳有漢光祿
四年題曰三公之碑三公者山名也其事載白石
神君與無極山碑此三山皆在真定之元氏云其
後二人姓名僅可見者南陽冠軍馮巡字季祖甘
陵夏方字伯陽○唐元氏令龐公清德頌邵混之
撰蔡有倫八分書開元二十四年八月○五代劉
詞元城人常被甲枕戈而臥謂人曰我以此取富
貴豈可一日輒忘之

藁城縣

在府東南
六十里

高齊之高城縣也隋開皇中改今名○寰宇記云
廢西壘縣在城西南七里古肥子國白狄別種也
漢所置縣故城東有石井戲井今俱爲社○廢宜
安城在縣西南二十五里戰國屬趙漢立宜安縣
于此唐貞觀初省入○廢九門城在縣西北二十
五里注戰國策以有九姓居此趙武靈王改爲九
門縣宋初省入隋圖經云九門縣有抱犢山在新

市城西通藺相如故宅曲而避之○望風臺即趙武靈王所築以望齊及中山亦曰寒臺○土山在縣西南十五里本春秋宜安故城岡阜崛起因以名之土山宜安之間有臺高數仞相傳李牧所築牧擊秦軍取宜安走其將栢齧于此今呼爲李牧臺○耿鄉在縣城西相傳漢耿氏宗族所居光武封偏將軍純爲耿鄉侯以此○塌子口在城西三十五里相傳馮異輔光武巡河北渡此又其地有櫟鄉即史記所云櫟陽在藁城矣又有新豐柏肆二縣俱唐時置尋省入藁城○酈陽水在縣西南二十五里其西有泥陽坂○滋水滹沱河俱在縣北二三十里○水衣坂在縣西北三十里大路側唐書安祿山陷藁城常山太守顏杲卿力不能拒與長史袁履謙迎見祿山賜杲卿金紫衣仍令守常山杲卿歸至中途少駐坂側顧履謙曰何爲着此衣履謙悟遂相與起兵討祿山杲卿竟以節死○趙王彭祖墓在縣城東大墩村北王漢景帝次子先立爲廣川王復徙爲趙王昔人耕塚地得石碑刻曰趙王彭祖墓○郭王墓在縣西南主真定恭王女下嫁郡功曹藁城人郭昌生子况爲綿蔓

侯女爲光武皇后及薨光武親臨送葬今墓傍高阜甚多疑皆其子孫所附葬也○石閣在縣南賈氏庄尚書石玠有詩不具錄

欒城縣

在府治南六十里

本漢關縣後魏太和中于此置欒城取平棘之舊欒城以爲名也志云欒武子墓在縣城西北五里武子晉大夫欒書封邑於此近墓有祠又有欒武臺相傳卽武子所築○志云臥龍岡在縣東八里盤曲如臥龍狀岡畔有浪頭丘高二丈餘上立五岳四瀆廟○彪塚丘在城西二里高亦二丈勢甚

嵯峨○南容村丘在縣城南有三丘俱高四丈巍然並峙○董保丘在舊縣址東高三丈餘登之可見城垣今爲欒城舖○范臺村在城東十里有舊臺基范水出焉○浹河在縣西十二里來自平山縣經縣境至趙州寧晉南入大陸澤○冶河在縣西北自滹沱分流而東逕城隅又南注之大陸俗傳漢太白渠也時遇水溢逆薪橫流人爭取之以供炊爨因資陶冶之用故名俗人謂之運糧河○龍潭灣在縣南五里亦冶河支派世傳有龍潛其中歲旱往禱取水以歸遂降甘澍今有五龍廟○

金華縣志 卷之七
殺狐林在縣城北十五里昔有民于村中射殺一
狐因名五代石晉時契丹主德光侵汴因死于此
帳下剖其腹實鹽載而北去時人謂之帝巴

無極縣

在府治東
八十里

本漢毋極縣唐武后時改作無字有毋極山距城
二十五里漢置縣取此上有毋極神祠并漢時封
號隸書刻碑○志云無極城北有天花樓甚高聳
相傳天女散花于上○空谷齋在城西南元逸士
何體仁讀書處○城西北有扈臺高出陵阜遙望
青雲層見迭出即之渺然○城塚記云魏甄妃墓

在縣北十五里之許垓村曹魏主丕妃也晉侍中
甄琛墓在縣東北之南劉村有石刻○新城在縣
西二十八里水經注云後魏太武帝南巡營築亦
曰資城以資水所經矣其水東南入滹沱河者舊
傳云中山靖王七代孫封資亭侯繡子征匈奴有
功薨謚武侯葬此因號侯坊陵○按志滋河在縣
南六里即資水也發源自山西之放圓山經靈壽
入行唐界張茂村伏流不見至府城三十里南廬
社復出從縣治南屈而北逕饒陽至河間入滹沱
○故魏昌城在縣東北二十八里即苦陘城也光

武封大將軍杜茂為苦陘侯水經注云魏文侯時
李克為中山相苦陘之吏上計而入多其前克曰
苦陘上無山源林麓之饒下無谿壑牛馬之息而
入多于前是苦吾百姓也遂執而免之漢章帝改
曰漢昌魏文帝復改為魏昌○康王城在縣北五
里相傳為東晉康王築今名其城曰康城○虛糧
塚在縣西二十五里有阜數十高丈餘周圍廣數
十步農夫耕其傍多得武械相傳蓋檀道濟唱籌
量沙之故地也○宋崇寧初晁以道為無極令時
王履道安中既第脩邑子禮用長箋自言以新學
竊一第為親榮非其志以道勉之曰為學當謹初
何患不遠到安中乃築一室榜曰初寮成集十与
名初寮集○金大定二年知無極縣馮翼撰有問
山堂記即晁說之所建縣堂名也堂下手植槐數
株陰森蒼古詳諸記中○空谷齋元隱士何體仁
讀書處

平山縣 在府西九十里

寰宇記云其城內實外險一名嘉陽城後漢之房
山縣也唐武德元年置嶽州旋廢至德元年改為
平山○隋圖經云房山有王母祠甚靈俗呼為王

正嘉州府志 卷之七
母山後漢書章帝元和三年幸趙祠房山即此也
在今縣西北五十里濺水出焉亦謂石白水又謂
之鹿水出行唐東入博陵謂之木刀溝一謂袈裟
水又從此過石嶂山南流入滹沱河前燕慕容皝
時房山王母祠前大樹自拔根下得玉圭壁八十
三顆光色精奇雋以爲神嶽之命遣尚書段勤以
太牢祭之每祀有一虎往來祠側性馴狎而不傷
物祠在縣東二十里○志云嘉陽城距今治十八
里即春秋晉之蒲邑也漢于此置蒲吾縣屬恒山
應劭曰蒲水出中山蒲陰東入河即謂此矣又有

西平州城在縣西門外昔爲西平州治遺址尚存
按今縣蓋因房山西平二名而兼用之○光祿山
在縣南八里上有後唐潞王金紫光祿大夫祠○
東林山在縣北二十里上有長老洞萬壽寺靜脩
庵其西爲西林山山頂一石高數尺名曰山碁盤
旁有二石室鑿列佛像俗名千佛堂又有試心石
橫出丈許下視千仞以爲道者試心之所俗傳趙
武靈王墓在焉山下塚跡見存又西二十里有白
鹿臺俗傳漢武帝登眺于此白鹿躍出故名又十
里爲廬山上有張仙翁祠又十里爲覺山中有覺

山寺○黃岡天相嶺抱兒石俱在境內見宋書

阜平縣

在府西北二百五十里

本漢行唐縣地宋置北寨於此金爲鎮明昌中陞阜平縣○志云北山在縣東北斑牛平陽鷄子小河諸水出焉又五里有大派山小派山以派河水所經也派河發源山西與縣南之當城河縣西之臘脂河縣東五十里之平陽河俱南流入滹沱○孫子嶺在縣東南二十里古老傳云孫臏脩道于此其有南巢北巢二園臏所藝也又二十里有石洞泉從洞口噴泉如簾名水簾洞亦孫子煉兵處

○志云鹿馱山在縣東五十里其狀似鹿因名○大茂山在縣東北七十里帝舜巡狩柴望于此山下有古祠詳見恒山宋沈括錄云常岑半屬契丹以大茂分春爲界

定州

在府城東北一百三十里

領縣三

本中山國漢立安險縣于此後漢改安喜縣蜀先主嘗爲安喜縣尉有故址在今城南晉太元間北燕慕容垂之所都也唐置定州宋政和中升爲中山府金元因之我明復改定州○州城本漢舊基魏主珪更築其東門曰博陵隋開皇于此置博陵

郡也北門曰定武唐建中于此置定武軍也古法帖有定武蘭亭本隋煬帝巡幸詔書云博陵昔爲定州地居衝要因改高陽郡矣○張曜中山記云中入城中有山故曰中山注水經云中山者城內小山側而欲上若委粟焉黑水東北遶漢中山故宮俗謂黑曰盧水不流曰奴靖王受封始移郡出盧奴城城北臨滏水南面派河杜預謂之管仲城也按靖王故宮在今城東北漢景帝子發受封于此薨謚靖王王有聞樂對文木賦世人傳誦之故宮有釣臺戲馬觀後魏神廡卽其故址劔爲新宮

曰新城宮志謂靖王塚在州治水豐倉西鞠爲荒圃明知州事倪磯爲開神道豎碑于左○注水經云滏水又東經京丘北對君子岸岸有哀王憲王陵次一泉源積水亦曰泉上岸又東經白土北其南卽靖王子康王陵○志云固城在州東三十里舊傳禹治水所築○新處城漢置屬中山郡光武封陳俊爲侯國○唐城在州北一十里堯自唐侯升爲天子此卽其故都也滏水西北自唐縣界流入亦名唐河○石曰河在州東北後漢章帝議置漕于此○黑帟泉在州西北二十里周廻畝餘流

入滌水○天井澤在州東南四十七里周廻六十
二里水經注云派水歷天井澤南水流所播爲澤
俗名天井淀○平山在州東五里兩山對峙低昂
若一故名山下有村曰高頭村○州西四十里嘉
山唐郭子儀敗賊將史思明于此後人因以嘉名
又二十里爲陵山其上多古帝王陵塚又有廬山
飛山與之對峙○中山記曰郡城東有舜甘泉及
二妃祠唐開元十道志云中山郡南有北臺卽燕
太子丹聞鷄處今呼爲聞鷄臺又有燕臺在州南
七里相傳趙將燕頗所築其村因曰燕村○鷄鳴

臺在州東南二十五里相傳光武自薊而南舍宿
於此鷄鳴卽棄去有村曰近塚村時光武爲王郎
騎所追忽遇耕夫令伏于溝內以土覆之得免後
卽位訪之耕夫已沒遂培土於塚以識焉今呼村
南北地必曰陵南陵北云○州城外有竹塢以唐
定州守杜牧得名牧字牧之少陵人穆宗時出爲
刺史每簿書之餘被短褐往來竹塢飲酒醪有所
得輒吟哦不輟時值雨偶懷六叔有一褐擁秋寒
小窓侵竹塢之句○金石古文杜牧之詩刻蘓子
瞻書王維陰陽竹刻及蘓子美千文章刻米芾淮

南避暑詩刻雪峰溥光楷書俱在郡圃其松醪賦
草書者蓋蘓文忠公于曲陽得松膏釀酒法所爲
賦也○中山後圃蘓公子瞻嘗得多葉杏種之因
作詩曰零露泫月葉溫風散晴葩春工了不睡連
夜開此花芳心誰剪刻天質自清華惱客香無有
弄粧影橫斜中山古戰國殺氣浮高牙叢臺餘袷
服易水雄悲笳自從此花開王肌洗塵沙坐令游
俠窟化爲溫柔家○子瞻劔雪浪齋故址在文廟
後其自序曰中山後圃得黑石白脉如蜀孫知微
所畫石間奔流盡水之變又得白石爲大盆盛之
激水其中名其室曰雪浪齋且勒銘于盆唇而復
爲詩銘曰盡水之變蜀兩孫與之不傳歸九原異
哉駁石雪浪翻石中乃有此理存玉井芙蓉丈八
盆伏流飛空激其根東坡作銘豈多言四月辛酉
紹聖元○子瞻又得竒石如松屏自爲贊曰燕南
趙北大茂之麓天偃雪峰地裂冰骨凜然孤清不
能無生生此竒偉此方之精蒼皮玉骨磽磽齷齷
方春不知沍寒秀發孺子介剛從我炎荒霜中之
英以洗我瘴按蘓文忠年譜公元祐八年由
學士出知定州云○志載古塔有二一在州治東

日華塔一在治南曰大塔創于宋咸平四年成於
宣和二年高十三級圍六十四步洞門八面鐵幢
四落飛竇懸梯俯眺百里知州宋祁紀歲月于巖
我洪武末年都督平安嘗毀華塔以甃城堞鎔鏤
幢爲戎噐而獨大塔無恙考諸傳曰宋陰築以望
契丹者故名爲料敵塔正德己卯秋

武宗南幸駐蹕于此揮灑宸翰淋漓壁閒故作飛
動之勢○衆春園在華塔寺畧存舊址宋韓魏公
爲守時嘗築臺池園囿仍自爲記畧曰郡北隅渚
水爲塘廣百畝餘植柳萬株亭榭花草之盛冠於

北陲蓋今宣徽李公昭亮始興之後實廢焉予之
來惧陷其心於不公也復完而興之凡棟宇樹藝
前所未備者一從新意罔有漏缺又治長堤鑿門
西南隅以便遊者于是園池之勝益倍疇昔總而
名之曰衆春庶乎良辰佳節太守得與吏民同一
日之適游覽其間以通聖時無事之樂後之人視
園之興廢其知爲政之用心矣○唐劉禹錫中山
人有陋室嘗自銘曰山不在高有仙則名水不在
深有龍則靈斯是陋室惟吾德馨○杜荀鶴中山
臨上人院觀牡丹寄諸弟詩閑來吟遶牡丹叢花

正志各州志卷之七
三
艷人生事略同半雨半風三月內多愁多病百年
中開當韶景何其好落向僧家即是空一別竟無
唯有此恐教醒坐對支公○金石畧云後魏定州
刺史崔亮頌神龜三年三月○唐定州刺史張萬
福墓誌無撰人姓名永徽五年四月○唐定州文
宣王廟記盧肇撰正書大中十三年八月○唐諫
議陽城墓在州治東有古碑公初中山人後乃徙
之夏縣或是其祖墓云

新樂縣

在州西南五十里

漢爲新市縣之地隋開皇十六年置新樂縣屬定

州取新樂故城爲名漢書成帝時中山孝王母馬
昭儀隨王就國爲建宮于樂里在西鄉因呼西樂
城時人語訛呼西爲新故曰新樂今尚以西樂爲
驛名○寰宇記云義臺在縣西十五里伏羲故城
中見後魏書碑字剥落不可讀識有洗兒池在義
臺後相傳炎帝生時洗身之處至今水流紅艷草
偃赤光其祥異所著也又有義臺在縣西南三十
五里後燕錄云慕容麟與北魏道武帝戰于此蓋
燕師敗績之地○志云沙河在縣西南源發山西
繁峙白坡頭口經流曲陽入縣界出饒陽至博野

縣與滋河合有現龍溪水源出縣之童山山高十
仞綿亘數里許下有小溪濼帶注于沙河按隋圖
經新樂縣有黃山出細石悞白可爲噐物土人工
之後訛爲童山○縣東十五里有杜姑村舊傳宋
太祖母杜太后生於此村有故宅基○春露亭在
縣南四十里元祭酒蘓天爵建以爲上躡遊適之
所地名孔村其處有水刀溝自神塘濬源東注沙
河○唐傳靈龜爲魏州刺史鑿永濟渠以通新市
乃行沙河水也

曲陽縣

在州西
六十里

本漢上曲陽縣也以在太行之陽轉曲處而名高
齊天保七年除上字○寰宇記云恒山在縣西北
一百四十里禹貢太行恒山至于碣石入于海孔
安國註二山連延至碣石也周禮曰正北并州其
山鎮曰恒山鄭注恒山在上曲陽高三千九百丈
上方三十里上有太玄泉神草十九種服之成仙
太史公以北岳有五名一曰蘭臺府二曰列女宮
三曰華陽臺四曰紫微宮五曰太乙宮或云即大
茂山也山北四百餘里號飛狐口有率然蛇孫吳
以喻兵勢其下有鳴石溪水側有石叩之極鳴○

治內北嶽廟碑古老相傳舜北巡至曲陽因阻雪
柴望有大石飛墜帝側時十有一月也後人游觀
者衆石遂作磨礮狀有唐碑僧邈撰文曠書開元
二十一年八月立又有河東節度使李克用題名
○沈括筆談云北岳廟中一亭桀立天霽氣清登
之可以遠望廟有鬼尉像在昭福門壁之西唐人
劉伯榮筆也毛骨森竒神采飛動後有作者莫能
摹擬諺云毘盧寺水北岳廟鬼蓋指此○志云范
水在縣北見隋書曲逆溪在縣南水流多曲故名
又有靈河發源縣西白土坰東流至三角潭與曲

逆溪合○狄水河在縣東三里發源恒山北谷南
流與滌水合世傳宋將狄青治中山時漕運於此
今淤塞有古石橋存○水經注云滌水又東右會
長星溝溝在上曲陽縣西北長星渚渚水東流又
合洛光水水出洛光溝東入長星水亂流東逕恒
山廟北漢末喪亂山道不通此舊有下階神殿中
世以來歲書法族馬晉魏改爲東西二廟廟前有
碑闕壇場相列其水東逕上曲陽縣故城北本岳
牧朝宿之邑也古者天子巡狩常以歲十一月至
于北岳侯伯皆有湯沐邑以自齋潔周昭王南征

不還巡狩禮廢邑郭仍存秦罷井田因以立縣縣
在山曲之陽是曰曲陽有下故此為上矣王莽之
常山亭也又東南流胡泉水注之水受胡泉逕上
曲陽縣南又東逕平樂亭北左會長星川東南逕
盧奴城南又東北川渠之左有張氏墓冢曰漢上
谷太守議郎張平仲碑光和中立川渠又東北合
漚水水有窮通不常津注○志云水竇崑在縣西
北五里水勢飛瀉兩崖間崑巔有蘓軾書浮休二
大字浮休張舜民之別號也偕于瞻遊此舊載為
張鷟者訛崑側有漱玉亭金章宗嘗賦詩其上○

少容山在縣南二十里一名黃山蓋殷女昌容服
食飛仙之所上有八會寺及宋封利民侯祠山上
引五臺水其池曰集聖池又有燕南奇勝四字刻
于北崖高處字大數尺時代莫攷○孔山在縣西
北十五里山畔一孔表裏洞澈故名又三十里有
蓮花寨峰巒九出狀如蓮花周圍峻絕惟一徑可
通其下臨水水深不測○香崑閣山在縣北六十
里絕壁千尋奇峰萬狀古碑碣甚多唐詩人賈島
隱于此又十里有洞曰王子洞內有商子碑飛巖
倒垂泉落如雨堂出天成名滴水堂○縣界有嘉

山石磴岩巖人跡罕到世傳五代末孟良避兵之所石磴井曰俱存元蔚昭福樵於此山見二翁奕棋從旁觀之良父斧柯脫落回家人民井里俱非故矣今名棋盤村○宋史開寶二年太宗圍太原命何繼均屯曲陽驛以精騎數千拒虜于石嶺關約以翌日亭午俟捷至已未上御北臺見一騎自北至乃繼均子承睿獻捷生擒虜刺史王彥符等二人帝命以示并城益喪氣云

行唐縣

在州城西九十里

史記趙惠文王八年城南行唐即此漢明帝時周

紆爲行唐長有不法者必懲無赦境內大治晉張國通爲行唐主簿愛育黎庶作興學校至今稱焉○水經注云行唐城上西南隅有井大若輪水深不測謂之輪井又云行唐城內北門東側祠後有神女廟廟前有碑其文曰王山將軍故燕薊之神童後爲城神聖女者此王華族石神夫人之元女也初趙武靈王營斯邑城彌載不立聖女發嘆應與人俱遂偕神童潛刖貞石百堵皆興不日而就故此神之靈應至今○縣北三十里王女山其下爲王女塘昔有蒲氏女嫁其夫樊年少而寡誓不

二適有寇逼而汚之氏乃投產死焉晉太康記行唐縣北二十里有夫人城即王女神所築也○志云無影山在縣南里許山伏地中微露石頂故名○柏山在縣西五里上有古栢大數十圍樹上缺環相傳竇建德椽以繫馬者○崑山在縣西北四十里峰巒環列人跡罕經相傳毘盧佛化身之所上有禪刹再十里為箕山峰形若箕亦云許由隱此或以許由為行唐人也上有棄瓢崑洗耳溪及巢父問荅碑○後漢郡國志云常山南行唐縣有石曰谷承潯沱之水以轉山東之粟民費不貲死亡相繼謁者鄧訓奏罷之○注水經曰滋水至行唐縣鹿水出焉謂之水刀溝入潯沱河攷志白鹿峪乃滋水所出東至新市入潯沱東漢滋水都尉治此○部河在縣治南發源楊川嶺流入縣界東注沙河有甘泉河在縣西北三十里發源甘泉廟前又縣北二十里有曲河發源武社山下又賈庄河發源自恒山來俱流注之南合滌水以入潯沱又縣東二十五里有倒馬關水發源靈壽縣山谷間流經定州北合滌水○城家記云行唐故城在縣北三十里古詆州治舊傳城下有石獅子石

直隸名勝志 卷之七

牛歲又為妖近掘城將半碎之城基尚存又十里
 為左人亭史記趙襄子使新穉穆子攻翟左人即
 此○晉冀缺墓在縣西北二十里晉大夫卻芮之
 子芮受采于冀因以氏之有古碑曰晉大夫冀缺
 之墓相距二里史家庄有李左車墓廣武君宅○
 王女塘漢元帝時有天淵王女降此故名其地名
 寓處里○洗墨池在縣之滋羊村相傳晉王羲之
 兄弟三人讀書處未詳但有池井水味甚甘○飲
 馬池在縣東庄頭村相傳唐尉遲敬德留守時開
 鑿今池上有鄂國公廟○州城池廣五里七十五
 步深八尺唐郭子儀李光弼與史思明戰于九門
 因開浚之○封崇寺北齊天保七年建有宋評事
 董蒙亭記

直隸名勝志卷之七終

直隸名勝志卷之八

閩中曹學佺能始著

冀州

在府東南二百里

領縣四

鄭康成尚書注云兩河之間曰冀州漢末冀州牧
兼領郡國于此魏黃初時冀州刺史自鄴徙信都
即今理也史記漢高帝分鉅鹿立清河信都常山
等郡是其一矣後漢書王郎僭號河北悉應光武
自薊南行有白頭翁曰努力信都為長安守光武
至信都偽太守任光開門出迎者也○英雄記云
袁紹刺冀州因光祿劉松鎮此時盛夏紹就松飲

旬日以避暑故河朔有避暑飲又云紹在冀州有神出河東號度朔君百姓爲立廟于西郊○郡國記云信都城內有曹魏冀州刺史丁紹頌德碑又有後魏刺史崔藏李平封隆之四碑文皆冠絕又云晉三張宅在州城內蓋張協兄弟俱善屬文郡人也○注水經云洛枯瀆又東北經辟陽亭北入信都城東散入澤渚昔禹導河北過洛水卽此水矣今謂之洛枯渠○濁漳水在州城西北六十里一名白溝衡水入馬亦名長蘆水濁漳之下流也信都記曰衡水有表潭渡歷下博城北而迤邐東

北注謂之九爭曲水味鹹苦俗稱苦河亦謂之黃漳河○寰宇記云郡有華陽亭相傳晉稽康學廣陵散于此又有辟陽亭在治東南三十五里又合陽故城舊地志並失所在據當州之東界有合陽城址漢高帝以代王喜棄國降爲合陽侯者王莽改曰宜鄉後省入扶柳矣扶柳漢縣距辟陽城二十五里闕駟曰縣有扶澤內多柳樹故名其城曰扶柳城○煮棗故城在州東北二十五里漢縣本六國時于此煮棗油後漢及齊以故事每煮棗于此有棗山在州西南五十里棗樹環山而植故名

又有桃城在州西北四十五里○後漢書信都有
安城澤城武陽城俱隋大業間廢又有育縣城後
漢書耿純迎世祖于育卽此處○觀津故城在州
東北九十里武邑縣界六國時燕望諸君樂毅封
此津其東南三里有青塚高三十餘丈周廻千步
漢文帝后父竇氏之青山也○葛榮陂在州西南
二十里唐貞觀初刺史李興公開趙照渠以注葛
陂之水今有渠跡存○魏王臺在州治南郡人周
金詩云魏王臺下玄雲暝袁紹城頭白日低○周
德帝陵在州城外帝名肱宇文周武帝祖平齊之

後改葬于此○漢張耳墓在城南唐尉遲恭墓在
城西尉遲堰○金石畧云漢冀州刺史王純碑熹
平四年立○漢冀州從事夏承碑建寧三年立○
後漢書皇甫嵩領冀州牧時黃巾賊起民不畊作
嵩請復租賦一年以賑饑民因歌曰天下大亂今
市爲墟母不保子兮妻失夫賴皇甫兮復安居○
魏志邢顒河間人太祖辟爲冀州從事時人稱之
曰德行堂堂邢子昂○北朝李公緒爲冀州司馬
撰趙語十三篇行于世○宋魯有開爲冀州守劔
養正堂黃庭堅銘又建百花樓高百餘尺上置鐘

鼓四壁皆繪花草因名按今已久廢故前人有百
花樓閣總丘墟之句

南宮縣

在州南
六十里

漢書高后元年封張敖子偃爲南宮侯圖經云光
武自薊疾馳至南宮界遇大雨引車入道傍客舍
馮異抱薪鄧禹燃火對竈燎衣處也今有南亭故
址○注水經曰漳水又逕南宮至于百尺溝與洺
水合○寰宇記云洺水枯瀆經漢舊遼城北東南
六里經南宮縣城又有坡塘在城北二十里○志
云扁鵲村在縣城西三里史記趙簡子疾五日不

知人使扁鵲治之病愈賜田四萬畝于此山下○
唐方鎮王武俊營在縣東南時李抱真自臨洛引
兵來會引數騎入武俊營俊嚴備以待之抱真見
武俊叙國家禍難天子播遷乃相持而哭誓同滅
賊卒破朱滔而解貝州之圍○縣有堂陽通利二
渠爲唐景龍延載等年所開以溉民田郎引鉅鹿
比下水也堂陽詳見新河○唐進士張昌齡墓在
縣西北七里有古碑在石佛寺後

新河縣

在州西
六十里

元置縣曰新河以界有新河水也本漢堂陽縣地

高帝封孫赤為侯國應劭曰縣在堂水之陽按長
 蘆水亦謂之堂水矣在縣南二百步○郡國志云
 信都堂陽九門城有古臺二所並號堯臺在新河
 廢城內距今治西三十里○志云顏良墓在縣南
 二十里又五里有孔將軍墓佚其名有古碑模糊
 難辨

棗強縣 在州南三十里

本漢舊縣武帝封廣川王子晏為酸棗侯即此縣
 道記云棗強縣東北十八里有廣川王故城燕慕
 容垂於此置廣川郡郡廢因移棗強縣理焉城外

即羌酋姚弋仲之故壘也○水經注云清河水又
 東北逕棗強縣故城西又東北逕棘津澤上有古
 臺耆舊相傳呂望賣漿臺按棘津在縣東北十二
 里今名李倉口左傳昭公十七年晉荀吳帥師涉
 自棘津註疏河津名也史記呂望東海人老而無
 遇賣食棘津即此○志云縣東北有平堤高堤西
 南有復陽堤皆漢縣為枯漳河所湮按復陽故城
 去今治十八里高帝封陳清為侯國平堤在縣西
 北三十里宣帝封河間獻王招為侯國又雍氏耶
 城在縣東北三十里即高堤之故跡也縣東十五

里有索盧故城後魏太和中分廣川縣置按索盧水本衛河支流經縣界入阜城故索盧縣以此名高齊省入○酸棗故城今入大名之滑縣界其處有韓王臺二俱在城南晉孫楚賦以為酸棗縣門外左右兩臺訪諸故老昔韓王聽政之觀也○金石畧云後魏故安東將軍棗強縣開國男孫蔚墓誌入武邑縣界蔚以正始中侍講禁內夜論佛經合旨因詔使加號曰惠蔚法師云

武邑縣

在州東北九十里

漢舊縣晉太康十年置武邑郡于此旋復為縣有

武強湖在縣北三十里後魏皇始三年曾移郡于此郡縣皆以此名○水經注云漳水又東南逕武邑郡北而東入衡水謂之交津口衡漳又東逕武邑縣故城王莽之順栢也晉武帝以武邑武隧觀津三縣為武邑郡治處○寰宇記云觀津丘在縣東南二十七里即竇氏之青山也跨入州界泲水西南自衡水縣東逕縣城西比過○志云縣東嶽廟有古碑石上現古梅樹枝葉宛然成文○縣東北五十里有馬圍臺昔齊師伐魯至其郊見一婦人抱姪棄子以走師問其故婦曰棄子割私愛也

抱姪存公義也齊師曰魯未可伐遂班師而還

晉州

在府東九十里

領縣三

春秋鼓子國蓋白狄之別種也漢下曲陽縣地左傳晉荀吳圍鼓昔陽亭杜預註云鉅鹿下曲陽縣有鼓聚按自晉伐鮮虞圍鼓其君烏鞮卒歸于晉乃知茲地屬晉已久州名蓋取諸此○禮云晉人將有事于河必先漚沱今漚沱河在州城南流入束鹿安平二縣界○水經注云漚沱水入雷河溝水過舊曲陽城是也後漢書下曲陽有斥彰城熹平中斷碑尚存○古城坡在州西五里鼓城山下

隋已來置縣國初省入州又有臨平真鄉曲鄉各

城在州境見魏書○京觀在鼓城北七里後漢皇

甫嵩攻黃巾賊張角弟寶于下曲陽獲首十餘萬

人聚爲京觀即此○箭鏹營在州南十五里故老

相傳漢光武與王郎交戰師行至晉境道遇伏兎

引弓射之兎挾矢而遁奔追里許遽失其蹤覓至

浮屠但見其鏹鏹中於小碑上遂駐營後以碑刻

佛因號射兎處曰石佛兎其營曰箭鏹營寺曰留

箭寺有碑無文高五尺廣二尺矢簇入石數寸動

搖不脫厥跡如新志謂州東十八里之凍河頭即

光武被王郎兵追急使王霸前行詭云水堅可渡處○紀信墓在州東百五十步故老相傳卽漢將軍紀信自焚以免高帝者○唐魏徵墓在州西南五里或以爲魏收墓收字伯起後魏時人○唐蒲州刺史雀瑞墓在州治南五里貞觀初舉孝廉者廟額護國昭惠王有元敎授任毅碑○唐晉州刺史裴府君碑上官儀撰正書姓名殘缺貞觀二十三年○周晉州長史韋君碑楊炯撰文孫希強八分書長安三年四月○金石古文云唐武德三年四月辛巳晉州人吉善行於龍角山見白衣老父

乘白馬朱鬣謂善行曰爲語唐天子吾爲老君汝祖也今年平賊後汝當爲帝天下太平必得百年享國子孫且千歲太宗遣使者杜昂致祭瀕史神復見謂昂曰歸語天子我不食何煩祭爲高祖異之立廟于其地授善行朝散大夫○墨客揮犀云有人說李寰建郎晉州表兄武恭性誕妄又稱好道及蓄古物遇寰生日無餉乃遺箱挈一故皂襖子與寰云此是李令公收復京師時所服願尚書功業亦似西平寰以書謝後聞知恭生日箱挈一破臙脂幘頭餉恭曰知深慕高真求得一洪崖先

生初得仙時幘頭兒得道一如洪崖賓寮無不大笑○按唐宋晉州乃平陽府今州元中統辛酉歲所置似非昔之晉州然攷宋史理宗景定二年蒙古陞鼓城縣為晉州又不在元時也

安平縣

在州東北九十里

漢縣高帝六年封鄂千秋為安平侯于此縣城北面有臺俗謂之神女樓臺上有聖姑廟像設甚古座下有井姑嘗汲水處人手探之其水即動○志云穀丘亭在今治西南十五里本漢縣王莽曰廣望亭後又改為博陵亭晉諸葛恢受博陵亭侯者是唐神龍初封雀玄暉于博陵即五王之一也有大風折其輅益武三思矯制殺之○礪石河西自定州義豐廢縣界入滹沱河在縣南二十三里○後漢尚書雀寔墓在縣西寔字子真著月令者唐李百藥墓在縣東北百藥為散騎常侍

饒陽縣

在州東北一百三十里

應劭漢書注云在饒河之陽也邑人毛萇為河間王博士註詩行于世世稱曰毛詩○寰宇記云饒陽故城在縣東北二十里齊天保中移饒陽理于魯口城即今理也晉書公孫淵叛司馬宣王征之

鑿滹沱入泃水以運糧因築此城蓋滹沱有魯沱之名因號曰魯口後魏道武皇始二年車駕幸魯口即此城矣隋大業中竇建德起兵于是處唐天寶之亂安祿山將史思明攻饒陽彌年始陷裨將張興被執不屈死之○通典云滹沱河舊在縣南即光武所渡處魏武帝因饒河故瀆決令北注新溝所以今在縣北後魏刺史楊貝改為清寧河又東自白馬渠出李公緒趙記曰此河魏白馬王彪所鑿故云○蕪菱城在縣東北四十五里光武自薊東南馳晨夜至饒陽蕪菱亭饑甚馮異進豆粥

處按志光武城在縣西南三十里即其征王郎所築馮母廟址在縣治西相傳漢馮異從光武其母囑之曰汝今盡忠莫思盡孝我寧死遂自縊後人建廟祀之○志云商王墓在縣南十八里勝史村昔有掘井者見其石題云商王墓井傍有商王廟不知建自何代○上方臺在縣南十里臺高四丈周圍五里上有龍母祠○花臺在縣西北十三里臺高五尺每春群卉盛開俗傳其萼異常因名○文獻通攷翰苑雜記一卷學士饒陽李宗諤昌武撰○石林詩話云諫議大夫李宗諤者侍中崧之

孫也父粲崧之庶子崧被禍時粲猶在襁褓其母
投之墻外身雖已出仍得獨免崧於故相昉爲從
叔世居深州饒陽墳墓夾道崧在道東謂之東李
昉在道西謂之西李故宗詠猶與宗諤連名

武強縣

在州城東一百六十里

趙武遂邑史記秦破趙將扈輒於武遂斬首十萬
卽此地也漢爲武強縣嚴不識以擊黥布功封武
強侯是矣有武強泉卽擔生蛇所陷之處也水經
注云衡漳又東北右合張平口故溝上承武強淵
淵之西南側有武強縣故治淵得其名焉東觀漢

記曰光武拜大司空王梁爲侯國者宿傳云邑人
行於途者見一小蛇疑其有靈持而養之名曰擔
生長而噬人里中患之遂捕繫獄擔生負而奔邑
淪爲湖縣長及吏咸爲魚矣今縣治半里許遺跡
尚存淵水又東南結而爲湖謂之郎君淵者宿又
云縣淪之日其子東奔復陷于此故淵得郎君之
目焉淵水北通謂之石虎口又東北爲張平澤澤
水所泛北決堤口謂之張刀溝北注衡河謂之張
平口亦曰張平溝○志云賈家溝在縣東北屯村
東流合漳水閭家溝在縣東坊頭滹沱之末流也

與龍池河水合而東流注清漳又云古河岔河俱在縣北分自清漳者今涸○千家河在縣西北八里鴈河在縣南十三里亭子河在縣東三十里東接武邑界○金石畧云唐武強縣令梁君德政碑缺撰人名劉玄明楷書垂拱元年四月按武強廢城在今治南五里又治北三十里之沙窪村乃秦漢武遂邑也遺壘俱存○隋皇甫與墓唐齒求墓俱在縣西北齒求歷官尚書左丞謚文憲與先人任冀州刺史故爲郡人今有村曰皇甫村

趙州

在府城南一百二十里

領縣六

春秋晉鄆邑之地戰國屬趙即武靈王營鄆以拒燕者漢晉俱爲趙國高齊始爲趙州古謠云詐作趙郡鹿猶勝常山粟即此○志云漢之趙理邯鄲西晉之趙理房子齊魏以來之趙理平棘即今治也平棘故城在州南三里春秋爲棘蒲地哀公元年師及齊師衛孔圉鮮虞人伐晉取棘蒲漢書文帝三年濟北王興居反遣棘蒲侯柴武擊之是矣今治內有棘蒲社○平棘山有二一在州北曰大平棘在州南曰小平棘皆去城百步許因其頂平而生棘故名後漢書光武自薊還中山至于南平棘

群臣請上尊號不許耿純進曰天下士大夫捐親戚棄土壤從大王於矢石之間者其計固望攀龍麟附鳳翼以成其所志也光武始從之六月己未卽位于鄗之高治前有望漢臺相傳卽純所築高七尋延袤二百八十尺臺西有古井 國朝成化間以脩垣得之其味甘美因名惠民泉○注水經云平棘城南門夾道有兩石柱翼路若高闕汶水東逕平棘縣南有石橋跨水濶四十步長五十步橋東有兩碑按今汶河上大石橋者是有唐中書令張嘉貞銘○志云空明石在州治廨內嶙峋竒

聳孔穴相通石上鐫空明洞天四字晉唐時物也又有古石獅在儀門外左右各一其右者刻大宋紹聖二年九月十一日各字又寶經堂在城內元太常院判楊靜適所建○寰宇記云故鄗城在州南界史記魏公子無忌救趙趙孝成王爲无忌築此以居之至漢初韓信破陳餘于此城○故欒城在州治西北春秋欒武子之邑也隋仁壽中于此立欒州旋廢俗呼爲輪城○宋子城在州東北二十里史記高漸離匿作于宋子是也晉衛恒四體書勢云鉅鹿宋子有耿球碑是袁術所立師宜官

書曰龍平山在宋子城之右父老傳聞其山高聳一日風雨驟發龍過而夷其半故名○十方壘在州南一里卽後漢羌侵河內趙魏百姓相驚詔作塢壘六百餘處之一也○塚廟記云漢馮唐宅在州南三里趙廉頗墓在州東二十里之郭里村又五里爲龍化村漢耿純墓在焉○北轅錄云趙州南光武廟有二石人首橫于路俗傳光武欲渡河二人致餉慮洩其蹤乃除之○廣潤陂在州治東二里唐永徽中鄆邑令弓志元所開引太白渠以注之者又有畢泓亦志元濬謂有畢姓者居之故

名○續博物志云襄趙間故春陵白水之地多得金屑土人謂之柿子金或曰委敬所種藥金最良○唐十道圖趙郡李吉甫撰字弘憲開元間宰相所上圖凡十卷○唐大曆中杭州司馬李端有司馬集三卷台州刺史李嘉祐有從一集七卷俱趙州人○石林詩話皮日休爲某處士墓碑云不知何許人然予觀其宿花石浦詩云蘓業叢臺廢苑中又嘗不應王武俊辟則趙人也○通鑑紀事石晉開運四年杜威降于契丹契丹主欲遣皇甫遇將兵入大梁以襲之遇曰吾位爲將相敗不能死

悉復圖其主乎至平棘謂從者曰吾不食累日矣何面目復南行遂扼吭而死

寧晉縣

在州東四十里

春秋晉大夫楊氏邑周職方二云楊紆伯僑自晉歸周封於楊卽此也漢置楊氏縣兼置癭陶縣後漢書渤海王惺反降爲癭陶侯是矣晉省楊氏入癭陶唐天寶初改爲寧晉縣○志云癭陶城在縣西南二十五里楊城卽今治周廻十有餘里有魏孝昌及隋大業間碑石○縣北鄉有堯城金元間縣曰唐城村曰唐丘有堯臺在縣東十五里隋圖經

謂堯禪舜處○大陸城在縣東南十里魚臺村本漢廣阿縣隋改爲大陸卽禹貢陸澤之地大河所經受滏洹沙滂諸水夏潦之時漳水潯沱南北交注其澤東西徑三十里直接隆平任縣俱百餘里漳潯二水遠徙去可以耕種按後漢書鉅鹿郡有大陸澤呂氏春秋九藪趙之鉅鹿其一高誘注云廣阿澤是也○按滏陽河發源磁州神麇山歷曲周隆平入大陸澤俗呼爲清水河其西有瀝城堡今名歷城村距縣東二十五里○洹水在縣南爾雅云兩水交爲洹也縣有四泉其在蓮花營及洹

北村各有二相去五六里東流至十餘里而合又十餘里至竇壩村有二泉相去各百步東行二百餘步而合伏流草間初微漸巨又三里許與前二水合迤邐南行而入大陸口沙水發源贊皇縣之黃沙嶺經縣北蘇村東南入大陸口泆水詳高邑下○豐河鹺河俱東南自趙州來經縣界入于清水又東南二十里有葫蘆河連大陸澤中爲沙浚諸水所匯葫蘆河者薄落水之訛也趙武靈王所云河薄落之水亦王莽之薄落亭矣五代史周世宗濬葫蘆河城李宴口以張藏英爲沿邊使

先是契丹屢寇河北輕騎深入無藩籬限闕郊野之民每困于殺掠言事者云深冀間有葫蘆河橫亘百里可防奔突詔王彥超韓通將兵夫浚之築城于李宴口留兵戍焉世宗詔問藏英以備邊之策藏英具陳地形要害請列置戍兵募邊人驍勇者厚其廩給自請隨宜擊討從之藏英到官數月募得千餘人彥超等視役嘗爲契丹所圍藏英引兵馳擊大破之自是河北之民乍得休息○志云寓目亭在縣治內碑字剝落莫知年代古塔在縣西南塔底村高七丈有古銘又縣北十里有晉太

尉楊駿墳高一丈喪亂無碑僅一小石誌存又去縣三十里有宋武惠曹彬祖墓卽光猷后之父也今名延台村

高邑縣

在州西南五十里

漢鄆縣地光武卽位于此析鄆字以爲名後漢書章帝五年北巡至高邑是矣○寰宇記云故高邑城在縣南二十里入栢鄉界今理乃房子縣之東境高齊天保二年所移按志古鄆城俗呼爲王莽城或曰王卽所築房子縣在縣西南十五里今屬臨城界俗呼其地爲倉房村○長岡在縣治西二

十五里岡巒聳秀環抱村疇間周迴十餘里中有兔兒坡尤爲寬廣○沛水在縣治南一名白溝亦呼爲沙河其水清漣漂者資焉發源贊皇縣歷栢鄉亭入葫蘆河又有黑水在縣北十里一名淮河亦發源於贊皇東流入縣境以達漕河○新溝發源榆林村潑流于栢鄉夏潦秋霖泛溢害稼元元貞間曹禎始開此溝導水民獲樹藝至今賴之○縣射圃西南有讀書臺在水中央地極窳下未嘗湮沒○列女傳商丘于胥者高邑人好牧豕吹竽七十不娶而不老但食菖蒲根餘水○軋日塔在

縣西南隅宋僧懷恭募建起工建中靖國元年落成元至正三年塔共十層高二十餘丈趾培厚土尖刺危霄鶴鶴飛禽巢處于上

栢鄉縣

在州南
七十里

後漢光武卽位於鄆之南千秋亭五城栢隋開皇十六年遙取栢鄉之名于此置縣○光武帝廟一名壇亭卽千秋亭也亭下有趙安墓不知所始志云在縣北十五里又五里之故城鎮卽漢鄆縣春秋哀公四年齊國夏伐晉取鄆是矣漢冀州刺史刺史所理合肥侯堅鐔墓在焉○栢鄉舊城在縣

西南十七里相傳唐堯時所築卽漢舊封栢鄉侯處○志云槐水在縣西北六里發源贊皇縣北黃沙嶺經元氏高邑遶縣界今槐水驛沿其名又十五有秋水潭及崆嶓山見隋書又午河源出太行之麓遶縣正南因以午名○縣東崇光寺後有鳳凰岡築土而成相傳昔有鳳凰棲集于上故名又縣西十五里舖有靈石粗肖人形截然中斷野史載漢光武夜至趙州南迷路聞人語問而弗應見二人立其傍怒拔劍斬之其一恐走去熟視之乃石也舊有光武廟基卽斬石人處又謂之石人指

路○金石畧云唐栢鄉令鄭君紀德碑李羲仲撰
聖曆二年十一月○縣東北之寇村有欒縣廢城
見杜佑通典

臨城縣

在州南
七十里

漢房子邑史記秦始皇二年趙救燕與中山公戰
於房子是也唐天寶中改爲臨城縣以西南十里
古臨城而名志云臨城卽晉臨邑春秋哀公四年
趙穆奔臨是矣後屬中山趙武靈王略中山至房
子因屬趙○山海經曰敦輿山泝水出其陰東流
注于彭水○按敦輿山在縣南七十里泝水所出

水經注以泝水東出房子城西出白土細滑如膏
可用濯綿色奪霜雪光彩鮮潔故俗言房子之纈
也魏都賦云綿纈房子抑亦猶蜀錦之濯濯江矣
○志云泝水源自元氏封龍山來卽史記韓信斬
成安君於泝上者經縣西十五里之栢暢亭將至
城五里許斷伏不流二百餘步復出東流經釣盤
山入沙河俗名三斷綠楊河○栢暢亭漢縣武帝
封趙敬肅王于終古爲侯國俗訛爲栢楊亭非也
奕亭在縣東北普利寺宋徽宗下晉陽時駐驛于
此命蔡京書奕亭二字立有石碣又嘉禾亭在縣

治後元時嘉禾出連穎故建此亭書元統年號○堯峰在縣東南二里云堯之故都也峰巒峭崿景色幽然○董岡在縣北門外東接堯峰西臨泚水環抱之奇於斯爲絕○釣盤山在縣東南五里相傳陳餘兵敗問其地曰釣盤山餘曰魚入釣盤吾其亡矣果及于難吳清詩云嵐翠空濛曉未乾井陘西指路漫漫成安已去三千載泚水依然繞釣盤○牛口峪在縣西二十里昔有童謠云竇人牛口勢不得久後竇建德爲唐兵所敗至此果被禽○鑊山在縣西南三十五里石色如鑊故名天臺

山在縣西五十里以其高聳而上平也又二十里爲杏樹山其山多杏春時望之華艷奪目又二十里卽太行山層巒疊嶂峻桀難踰爲畿輔之重鎮云○鵝鷓井在縣西北二十里舊傳項羽引兵追漢高祖將及高祖避難井中有雙鷓集井上追者見而不疑遂得免上有漢高帝廟元至正三年里人傳逢吉重脩有迎送樂歌二章○聖井岡在縣東北三十里岡上有井冬夏不竭遇旱禱之立應土人建祠焉因名聖井岡○蘇文忠集有臨城道中作詩序云予初赴中山連日風埃未嘗了了見

太行也今將適嶺表願以是爲恨過臨城內丘天氣忽清徹西望太行草木可數間巒北走崖谷秀傑忽悟歎曰吾南遷其速返乎退之衡山之祥也書以付邁使志之詩云逐客何曾著眼看太行千里送征鞍未應愚谷能淹柳可獨衡山解識韓

贊皇縣

在州西九十里

隋開皇六年置以縣東南贊皇山爲名穆天子傳癸丑至房子登贊皇山是也山上有穆王廟及碑每遇災旱公私祈請焉○贊皇山有孔子嶺巖室寬廣其下石相拒狀若楹柱時人謂三樑九柱之

室室內石人像類執書卷故名孔子嶺○槐水出贊皇山一曰渡水亦曰濟水自別是一濟卽詩云出宿于濟者非四瀆之數也水西玄石孤峙亭世人謂之石莖山半東北水流積成坡澤澤旁石上有牛跡大小相兼十餘非人工可致○攷志贊皇山在縣西南二十里高百餘丈周穆王伐犬戎戰勝于此因贊皇爲山名唐李德裕有秋日望贊皇山詩太和四年八月立碣○環山亭在縣城西比隅地勢特起高百餘丈四圍之山贊皇在其南敦輿在其西又西北曰四望東南曰粟堆嶽崑崙峯

如屏如障若斷若續真爲之環列然梁車叟登環山亭登臨邀客倚危欄衣袂春風尚怯寒近水遠石崑下卽槐水發源處其深莫測俗傳龍潛于此故名有古石碣貢士張廷紀於三官廟隙地掘得移置之○按粟堆山在縣東南十五里以山形如委粟也四望山在縣西北二十里登臨其上眺遠莫蔽故名○壇山在縣東北十五里周穆王駐驛於此古篆吉日維戊四字原在崖壁上宋權郡事李中祐闢石括木陷置廳事右壁自爲記○縣東

有五馬山巖隙出泉其味甘美俗傳五馬將軍至此患渴忽所乘白馬跑地泉出因名白馬泉宋建炎初和州防禦使馬擴聚兵于此山下五馬將軍或卽其號也○距縣一舍許有平泉庄平泉唐李衛公自號也乃其遊息之所周廻十里堂榭百餘楹竒花異艸珍松異石靡所不致嘗自作記云鬻平泉者非吾子孫以一石一樹與人者亦非佳子弟也元末兵燬今爲王泉寺基又距縣百里有石乳龍泉懸巖如乳其中吐泉故名○城塚記云李左車城在縣南十里回車村有廣武君所築城址

有韓信將臺即信解左車縛處○泝水在縣西南四十五里韓信斬陳餘於此故李左車曰陳餘軍敗于鄒下身死于泝水也漢王以將軍禮葬之○李肅墓在縣東十五里塞里村三國魏為齊州刺史有誌銘存隋內史李德林墓亦在焉○唐中書令李嶠墓在縣北二十里許亭村○李德饒墓在縣東二十五里平泉公之兄也○李華墓在縣西二十里鮑家灘北唐吏部員外郎○韓府君墓在縣之北馬村公諱昌薛韓魏公始祖也五代時為誠城令卒因葬焉

隆平縣 在州東南一百里

本漢廣阿縣隋改為象城縣唐又改為昭慶至宋始曰隆平○志云廣阿故城在縣東十里又二里為隆平故城宋大觀間因水患始移今理俗呼此地為舊城村○思賢堂在縣治西宋宣和間縣令孫易倣唐令王璠建仍書古賢令宓子賤卓茂魯恭等治蹟以致慕效之意中有唐天寶五年都尉李大亮撰昭慶令王璠清德頌碑○金石畧云唐開元碑在縣東南十二里光業寺內按即唐祖陵碑象城令楊戩撰文元和志云唐十三代祖宣皇

帝塋此隋義寧初塚上嘗有五色瑞氣高祖啓運號曰建初陵○畜經云老僧河在縣北五里神泉河之次相傳有一老僧尋水至此以杖卓地泉湧成溪溪上石橋亦名老僧橋○澧水在縣東十里源自漳河分流經縣界與沙河合注葫蘆河○縣北有槐武河及東北有小泊大陸諸水皆浸鄉也史記趙武靈王嘗遊於此而夢神女使群從賦之以侈其事○按廣阿大麓同澤異名舊志因尚書納于大麓之文遂有堯臺象城二跡隋圖經大麓有堯臺高與縣城等世謂堯禪舜處地理志又云

大麓有象城縣舜躬所封之邑也○漢任敖墓在縣東四里高帝時為御史大夫封廣阿侯卒塋于此

深州 在府城東二百里 領縣一

本漢下博縣應劭云因泰山有博縣此故言下王莽改曰閭博亦謂在博水之下矣後漢書光武曾迷于下博也桓帝以後及晉俱為博陵郡隋開皇中郡廢始立深州以州北故深城為名志云廣阿陸澤州境有之城名曰深取此陸澤唐深州治也在今城東北五里○寰宇記云平澤河即王霸言

水堅可渡處俗因號爲危渡距今州東四十里凌
消村是廣陵石宇詩云村落人家起曙烟凌消危
渡至今傳時清何用追陳跡禾黍秋風遍野田○
文瑞堂在故州治唐張鷟爲兒時夢紫文大鳥止
其庭大父曰吾聞紫文鸞鷟也若壯殆以文章瑞
朝廷乎遂命名鷟後鷟爲學士果以文名○東鹿
峒在州治西峒穴深邃外隘內廣可容千餘人有
線路通天○白馬溝在州東三十里相傳魏白馬
王彪所開以溉田者石象村在州西北十五里昔
傳有石象載佛像自五臺浮漚沱而來遠近人力

莫之能舉深人迎以建寺因名其村○孝義鄉在
州之大馮村五代時李自倫六世同居故名○唐
鑑穆宗長慶二年韓愈受詔宣諭王廷湊使解深
州之圍愈至鎮廷湊拔劔以逆之及館甲士
羅于廷廷湊言曰所以紛紛者乃此曹所爲非廷
湊心愈厲聲曰天子以尚書有將帥材故賜之節
鉞不知尚書乃不能與健兒語耶廷湊氣奪乃麾
衆使出謂愈曰侍郎來欲使廷湊何爲愈曰神策
六軍之將如牛元翼者不少但朝廷顧大體不可
棄之耳尚書何乃圍之不置廷湊曰卽當出之因

與愈宴禮而歸之縱元翼將十騎突圍而出○唐魏府君墓在州東十里之魏村諱行覽魏知古父也贈河陽令卒塋于此有知古自撰誌銘○宋歐陽珣冢在州南三十里舊城外珣吉州人爲南康錄事靖康中論和議忤旨時相遣珣蒞割河朔地會深州固守不下虜以珣至城下俾致朝命珣慟哭謂城上人曰朝廷爲奸臣所誤汝等勉爲忠義報國虜怒殺之遂塋於此

衡水縣

在州南五十里

本漢桃縣地隋開皇中置衡水縣在長蘆河西志

云衡水在縣西北亦曰長蘆水濁漳之下流也水有袁譚渡歷下博城西北逶迤而東北注謂之九曲水縣西南又有北沼遇漲則通于衡漳○縣南二里羊令渠唐延載中縣令羊元珪引漳水北流以達城隍○孔賢庄在縣西北七里有唐孔穎達墓故名繼子忠孫惠元世稱三世司業有于志寧所撰碑○益村在縣東南有唐益文達墓其宗人文懿亦以文學顯達號二益○縣之寶雲寺有古鐘唐貞元六年造卽今譙樓鐘也

直隸名勝志卷之八終



